

*Relaciona cu
envolvimento di FBI
den caso Natalee*
**Awe merdia caso
abogadonan di
rumannan
Kalpoe y van der
Sloot contra
Ministerio
Publico**

Awe den seccion B

**Clyde Harms
y Milagro
Bracho a
casa na
Maracaibo**



Awe den seccion C

**Rafael Palmeiro
di Orioles di
Baltimore a
habraca su
propio
credibilidad y
punto**


Ayeratardi Consejo Electoral a reuni

Mester dicidi si Benny Nisbet tin cu presenta lista cu 500 firma of no




ORANJESTAD – Ayeratardi den oficina di Censo a tuma lugar e reunion di Consejo Electoral. Segun lei, representante di e tres partidonan di mas grandi den Parlamento, por forma parti di e Consejo Electoral. Na e reunion di ayera a keda acepta cu sr. Christiaans di AVP, sra. Tromp Bregita di MEP y sr. Benneth di PPA ta forma parti di e conseho. E otro miembronan di e conseho ta sr. Wernet, sr. Pablo cu ta e miembro acesor y sr. ing. Maduro cu ta e presidente. Awe e reunion ta continua pa papia riba e presentacion di lista di partidonan.

Taxista deteni cu arma y droga den taxi



ORANJESTAD – Ayera atardi Polis a intercepta un taxi na Sero Patrishi caminda a haya e taxista cu un arma y dos saco di plastic cu droga. E taxista a keda deteni mientras cu a confisca e taxi. Lesa pagina dos.

Expertonan Hulandes a interoga Joran ayera



ORANJESTAD – Manera Bon Dia Aruba a publica, ayera Joran van der Sloot a wordo busca na KIA y hiba warda di Polis na Playa caminda el a wordo interoga pa e expertonan Hulandes. Lesa pagina tres.

Fiscal Mayor mr. Jansen bek na Aruba

ORANJESTAD – Ayera anochi Fiscal mr. Jansen a yega bek Aruba despues di su vacacion di dos siman. Investigacion cu Bon Dia Aruba a haci ta mostra cu awe e lo reanuda trabou mientras cu Fiscal mr. Gerretschien lo tuma su vacacion.



Clyde Harms y Milagro Bracho a casa na Maracaibo

ORANJESTAD- Na cuminsamento di juli Clyde Harms, e conocido President di Aruba Scholarship Foundation, a drenta enlace matrimonial cu Srta Milagro Bracho Huerta na Maracaibo, Venezuela. A acto civil a tuma lugar den Salon Dorado di Gran Hotel Delicias y a wordo oficia pa Profesor Giovanni Villalobos, Director General di Alcaldia di Maracaibo substituyendo pa Dr. Gian Carlo di Martino, e Alcalde di Maracaibo, cu mester a bai Peru cu President Chavez e dia anterior. Como testigo a fungi dos ruman Mason: Sr. Rudy Koolman, di Logia El Sol Naciente di Aruba y

Dr. Nazario Luis Fernandez Camacho di Logia Los Generadores di Maracaibo. Otro testigonan tabata Lic. Dulce Maria Bracho, ruman di e bruid, Lic. Lila Urdaneta, Dra. Angela Castaño y Lic. Maria Parra, e tres ultimonan, abogado di Alcaldia di Maracaibo y amiganan intimo di e pareha. Despues di e ceremonia legal e fiesta di matrimonio a tuma lugar na e mes salon cu musica di e orkesta bailabel "Clasico" cu ta consisti di 15 miembro di orkesta filharmonica di Maracaibo. E prome piesa tabata e famoso waltz di Padu del Caribe, "Abo So" cu tur e Arubianonan presente a canta


na honor di e pareha. Di Aruba a bay Maracaibo pa celebra cu Clyde y Milagro amigonan manera Karel Wever, Robbie de Kort, "Dadou" Croes, Roy van Putten, Rudy Koolman cu Amelia y Raymond, "Djispie" Franken, Charlie van Eer, Melvin y Sandra Loefstok. Durante e fiesta un grupo di tres dama a sorprende tur hende cu baile arabe, un regalo di algun ruman Mason di Logia Los Regeneradores. Na final di e fiesta tabatin otro sorpresa: Un Mariachi contrata pa duna e pareha un serenata pa nan amigo Waytù, e Lic. Alberto Herrera cu pa hopi aña tabata presidi e comision di asuntonan indigena di e gobierno nacional di Venezuela. Adhunto algun potret di momentonan di e gran dia den bida di e pareha Harms-Bracho. Nos ta desea Milagro y Clyde tur felicidad di mundo.



E felis pareha Milagro Bracho y Clyde Harms.



Serenata di Mariachi tabata un sorpresa di Lic. Alberto Herrera y su señora, amigonan di e pareha.



Pa habri e fiesta, e grupo "Sopranos di Aruba" a canta e waltz "Abo So" di Padu del Caribe pa e pareha. D.r.p.d Robbie de Kort, "Djiespi" Franken, Karel Wever, Amelia Koolman, Rudy Koolman, Raymond Koolman, "Dadou" Croes, Roy van Putten y Charlie van Eer.



Show di bellydancers tabata un regalo di algun ruman Mason di Maracaibo.



Profesor Giovanni Villalobos ta oficia e ceremonia civil. E tesigonan ta Lic. Nazario Luis, Lic. Lila Urdaneta y Dra. Angela Castaños. E bisti di Angela ta un manta formal di e indionan Waytù di Guajira. Atras por mira varios di e amigonan cu a bin di Aruba. E otro testigonan tabata Sr. Rudy Koolman, Lic. Dulce Bracho y Lic. Maria Parra



Potret formal di e pareha cu e grupo di Aruba. D.r.p.d. Rudy Koolman, Raymond Koolman, Amelia Koolman, Sandra Loefstok, Melvin Loefstok, Charlie van Eer, "Djiespi" Franken, Karel Wever, "Dadou" Croes, Roy van Putten, Robbie de Kort.